

共同經課-1 使徒行傳三章十二節～十九節

12 彼得看見，就對百姓講：「以色列人啊，啥事掠此個做奇怪？啥事注目看阮，那親像阮用家己的才能抑是敬虔互伊行？13 亞伯拉罕、以撒、雅各的上帝，就是咱列祖的上帝，已經榮光伊的奴僕耶穌；就是恁諸個所送交的。閣佇彼拉多的面前，當伊擬欲放伊的時，恁閣毋認伊。14 按呢恁毋認彼個聖閣義者，反轉求伊用一個兇犯互恁。15 恁害死活命的人君，就是上帝對死人中互伊復活者；阮諸個做伊的干證。16 因為信伊的名，就伊的名互此個恁所看所識的人勇健；是彼個對伊來的信，互伊齊全好佇恁眾人的面前。17 兄弟啊，今我知恁按呢行是對毋知影，恁的官府也是按呢。18 獨獨上帝用眾先知的嘴，讖語伊的基督所欲受的害，伊有按呢應驗伊。19 所以，恁著反悔來越轉頭，互恁的罪會得擦消，互安樂的日期會對主的面前來。

共同經課-2 詩篇四篇

1 [大衛的詩交互樂官；用絲弦的樂器。]顯明我的義的上帝呀，我求叫的時，求你應我！我佇困苦的中間，你曾互我寬闊；今求你憐憫我，來聽我的祈禱！2 恁諸個上等人啊，將我的榮光變做凌辱欲到底時？恁意愛空虛，搜尋無影跡，欲到底時？（細拉）3 恁著知，耶和華已經分別敬虔的人做伊家己的；我求叫耶和華，伊欲聽我。4 恁著驚惶，毋通犯罪；佇眠床裡，心著三思，亦著肅靜。（細拉）5 著獻義的祭，亦著倚靠耶和華。6 多多人講：是誰會指示阮甚麼好處？耶和華啊，求你用你的面的光，來照阮。7 你互我心內有歡喜，贏過人得著多多五穀及新酒的時。8 我欲安然倒啲暈，因為只有耶和華——你互我安穩倚起。

共同經課-3 約翰壹書三章一節～七節

1 恁想看父疼咱到怎樣，互咱稱做上帝的子；咱也實在是。所以世間人毋識咱，因為毋識伊。2 所疼的兄弟啊，現今咱做上帝的子，將來怎樣，猶未顯明；咱知伊若顯明，咱就親像伊，因為咱欲看見伊照伊實在的款。3 見若靠伊才有此號向望的，本身清氣，親像伊是清氣。4 見若犯罪的，也行不法；罪就是不法。5 恁也知伊曾顯現，是欲除去罪，也在佇伊無罪。6 見若住佇伊的，無犯罪；見若犯罪的，未曾看見伊，也毋識伊。7 細子啊，毋通互人迷惑恁。行義的就是義，親像伊是義。

共同經課-4 路加福音二十四章三十六節 b～四十八節

36 耶穌本身倚佇 in 中間，給 in 講：「願恁平安！」37 in 印愕閣驚，掠做所看見的是神。38 伊就給 in 講：「恁啥事茹亂？心內生起僥疑啊？39 著看我的手，我的腳，就是我本身。摸我就知！因為神無骨無肉，照恁看見，我攏是有。」40 講按呢，就將手及腳互 in 看。41 學生為著歡喜的緣故，猶久無信，閣啲奇怪，伊給 in 講：「恁佇遮有甚麼通食無？」42 in 就將焗的魚一片互伊。43 伊提去，當 in 的面前食伊。44 閣對 in 講：「諸個就是我猶久及恁佇啲的時所對恁講的話：講見若佇摩西的律法，及許個先知，以及詩篇，所記載指我的話攏的確著應驗。」45 就開 in 的心竅，互 in 會曉悟許個聖經，46 閣給 in 講：「有按呢記載，基督著受苦，第三日對死人中復活，47 也反悔及赦罪的道理，欲佇伊的名來傳到萬邦，是對耶路撒冷起。48 恁做諸個代誌的干證